

## Wapeni Wengine Maji ya Uzima

Walakini ye yote atakayekunywa maji yale nitakayompa mimi hataona kiu milele; bali yale maji nitakayompa yatakuwa ndani yake chemchemi ya maji, yakibubujikia uzima wa milele—**Yohana 4:14**.

Katika mazungumzo Yake na mwanamke Msamaria, badala ya kukishushia hadhi kisima cha Yakobo, Yesu aliwasilisha kitu kilichokuwa bora.... Aliyageuzia mazungumzo kwenye hazina Aliyotaka kuitoa, akimpatia mwanamke kitu kilichokuwa bora kuliko alichokuwa nacho, yaani maji ya uzima, yaliyo furaha na tumaini la injili.

Yesu alionesha upendo mkuu sana kwa mwanamke huyu mmoja! Maneno Yake yalikuwa ya kina na ya ushawishi mkubwa mno! Mwanamke yule alipoyasikia, aliacha mtungi wake na kuelekea mjini, akiwaambia wale aliokutana nao, “Njoni, mtazame mtu aliyeniambia mambo yote niliyoyatenda. Je! Haimkini huyu kuwa ndiye Kristo?” Tunasoma kwamba wengi wa Wasamaria wa mji ule walimwamini Yesu. Na ni nani anaweza kukadiria mvuto ambao maneno haya yaliuweka kwa ajili ya kuokoa roho katika miaka ambayo imepita tangu wakati huo!

Yesu alikutana na watu Yeye binafsi. Hakusimama kando wala kuwatenga wale waliohitaji msaada Wake. Aliingia katika nyumba za watu, akawafariji waombolezaji, akawaponya wagonjwa, akawaamsha wasiojali na akaenda huku na huko akitenda mema. Na tukifuata nyayo za Yesu, ni lazima tufanye kama alivyofanya. Ni lazima tuwape watu msaada wa aina ile ile ambayo Yeye aliwapa.

Bwana anatamani kwamba neno Lake la neema lifikishwe kwa kila nafsi. Kwa kiwango kikubwa hii lazima itimizwe kwa kazi binafsi. Hii ilikuwa mbinu ya Kristo. Kwa kiasi kikubwa kazi Yake ilihusiana na mahojiano binafsi. Alikuwa mwaminifu sana katika kuiheshimu nafsi ya msikilizaji mmoja. Kupitia nafsi hiyo moja ujumbe mara nyingi ulienezwa hadi kwa maelfu.... Kuna umati ambao hautafikiwa kamwe na injili isipokuwa ipelekwe pale walipo.